

**Soalan 1-2**

Pilih jawapan yang **paling sesuai**.

1. “Ayah melarang _____ bergaul dengan budak-budak nakal itu,” kata Farhan kepada adiknya.
A dia
B kami
C kamu
D kalian

2. “Cerek itu masih boleh digunakan untuk _____ air,” kata nenek kepada kakak.
A merebus
B menanak
C mengukus
D menjerang

Soalan 3

3. *Pilih ayat yang betul.*
A Dani sedang melakukan aktiviti senaman di dalam gimnasium.
B Sultan Mahmud amat menyayangi kedua orang putera baginda.
C Semua baju-baju kotor di dalam bakul itu telah dibasuh oleh ibu.
D Mereka sekeluarga berjalan di pantai maka menikmati keindahan alam.



Soalan 4 – 6

Baca petikan di bawah dengan telitinya, kemudian jawab soalan-soalan yang berikutnya:

Pada pagi itu, Jia Meng pergi ke Pasar Mini Jimat bersama-sama ibunya. Pasar mini itu terletak bersebelahan dengan Kedai Runcit Hasan dan Kedai Makan Selera.

Di Pasar Mini Jimat itu, ibu Jia Meng membeli pelbagai barang keperluan dapur seperti beras, gula, minyak masak, dan roti. Ibu Jia Meng agak tergesa-gesa kerana beliau mahu pergi ke Pasar Awam Kuala Selangor pula untuk membeli ikan.

Sebelum membeli sesuatu produk makanan, Jia Meng dan ibunya akan membaca label untuk mendapatkan maklumat tentang produk tersebut. Dengan cara itu, mereka dapat mengetahui kandungan, berat, dan tarikh luput produk tersebut.

4. Ibu Jia Meng membeli barangan keperluan dapur di

- A Pasar Mini Jimat.
- B Kedai Runcit Hasan.
- C Kedai Makan Selera.
- D Pasar Awam Kuala Selangor.

5. Pilih pernyataan yang **benar** tentang petikan.

- A Jia Meng mengikut ayahnya pergi ke Pasar Mini Jimat.
- B Ibu Jia Meng mahu membeli ikan di Kedai Makan Selera.
- C Jia Meng membaca label sesuatu produk makanan sebelum membelinya.
- D Pasar Mini Jimat terletak bersebelahan dengan Pasar Awam Kuala Selangor.



6. Yang berikut ialah maklumat yang terdapat pada label sesuatu produk makanan kecuali...

- A rasa.
- B berat.
- C kandungan.
- D tarikh luput.

Soalan 7 – 10

Baca maklumat dalam **Bahan 1** dan **Bahan 2** dengan telitinya, kemudian jawab soalan-soalan yang berikutnya.

Bahan 1

Kolam Pancing Tok Manan

Jom memancing ikan di sini. Terdapat pelbagai spesies ikan air tawar sedia untuk dipancing.

- Waktu Operasi: 9:00 pagi hingga 6:00 petang
- Bayaran Masuk: RM10.00 (1 jam)

Pertanyaan/Tempahan:
Hubungi Encik Jamal (012-9078501)



Bahan 2

Pada suatu petang, Adnan dan ayahnya pergi ke Kolam Pancing Tok Manan. Kolam pancing itu terletak tidak jauh dari rumah mereka. Di kolam itu, terdapat pelbagai *spesies* ikan air tawar seperti lampam, patin, dan haruan. Mereka memancing ikan di sana selama dua jam.

Sebelum pergi memancing ikan, Adnan dan ayahnya menyediakan segala kelengkapan memancing seperti joran, mata kail, dan umpan. Mereka menggunakan umpan cacing dan anak katak. Selain itu, mereka turut membawa tikar dan beberapa botol air minuman.

7. Apakah yang dilakukan oleh Adnan dan ayahnya sebelum mereka pergi memancing ikan?

- A Menghubungi Encik Jamal
- B Mencari lokasi kolam pancing
- C Menyiapkan bekalan makanan
- D Menyediakan kelengkapan memancing

8. Selain itu, mereka turut membawa tikar dan beberapa botol air minuman.

Penjodoh bilangan yang sesuai dengan perkataan bergaris di atas ialah

- A helai.
- B keping.
- C gelung.
- D bidang.

9. Perkataan *spesies* dalam **Bahan 1** dan **Bahan 2** boleh digantikan dengan perkataan

- A rupa.
- B jenis.
- C warna.
- D bentuk.



10. Pilih pernyataan yang benar tentang **Bahan 1** dan **Bahan 2** di atas
- A Kolam Pancing Tok Manan dibuka pada pukul 10:00 pagi.
 - B Kolam Pancing Tok Manan terletak jauh dari rumah Adnan.
 - C Adnan dan ayahnya menggunakan umpan cacing dan anak katak.
 - D Adnan memancing ikan dari pukul 9:00 pagi hingga pukul 6:00 petang.

Bahagian B

Soalan 1

Baca petikan di bawah, kemudian jawab soalan-soalan yang berikutnya.

Lim dan adiknya sedang bermain basikal di taman permainan. Setelah bermain selama setengah jam, hujan lebat turun secara tiba-tiba. Lim dan adiknya tidak sempat berteduh. Mereka pulang ke rumah dalam keadaan basah kuyup. Ketika tiba di rumah, ibu mereka, Puan Yong sedang tercegat di muka pintu.

“Bersihkan badan kamu di bilik air,” kata Puan Yong sambil menghulurkan tuala kepada Lim dan adiknya.

Lim dan adiknya menerima tuala tersebut. Mereka segera mandi dan membersihkan badan. Mereka mengelap badan sehingga kering dan memakai pakaian yang bersih.

a) Lim dan adiknya bermain basikal selama _____.

b) Mengapakah Puan Yong menyuruh anak-anaknya membersihkan badan mereka?



c) Gariskan **satu kata kerja transitif** yang terdapat dalam ayat yang diberikan.

Mereka mengelap badan sehingga kering dan memakai pakaian yang bersih.

d) Tuliskan (**BETUL**) bagi ayat yang **sama maksud** dengan ayat yang diberikan.

“Bersihkan badan kamu di bilik air,” kata Puan Yong sambil menghulurkan tuala kepada Lim dan adiknya.	
Puan Yong menyuruh Lim dan adiknya membersihkan badan di bilik air sambil memberikan tuala kepada mereka.	
Puan Yong menasihati Lim dan adiknya agar membersihkan badan mereka sambil menghulurkan tuala di bilik air.	

Soalan 2

Baca dan fahami situasi di bawah. Kemudian, berikan pendapat kamu berdasarkan situasi tersebut.

*Panjangnya jawapan kamu hendaklah **tidak lebih daripada 30 patah perkataan**.*

Kamu akan menyertai pertandingan syarahan di sekolah tidak lama lagi. Kamu berasa bimbang jika tewas dalam pertandingan tersebut. Masalah itu telah menyebabkan kamu tidak dapat tidur dengan lenanya. Kamu berasa amat stres.

2. Apakah tindakan yang perlu kamu lakukan?
